




嵇庵詩集





道光甲辰秋



嵇山菴集

頌性老人題

序
 憶辛巳夏見汪雲溪所持筆上一詩為梅君作讀而善
 之以素未相知就謂雲溪欲得一見後晤雲溪詢之似
 已道達而梅君意不遽來者又趣之多時梅君始一來
 談頃刻去繼不復至予意謂梅君不來也及壬午九月
 忽來談良久娓娓清辯越日復來辯稍息予贈以詩隨
 示予所作詩一册予為綴以辭有云士生今日必窮乎
 源流正變而後詩學乃全風騷炳若日星自不必論漢
 魏之作純乎聲情而氣骨特厚六朝以降發為體義而
 文采疊今之為詩者易於古人而難於古人何也不

道光甲辰秋



嵇山菴集

順性老人題

序

憶辛巳夏見汪雲溪所持筆上一詩為梅君作讀而善之以素未相知就謂雲溪欲得一見後晤雲溪詢之似已道達而梅君意不遽來者又趣之多時梅君始一來談頃刻去繼不復至予意謂梅君不來也及壬午九月忽來談良久娓娓清辯越日復來辯稍息予贈以詩隨示予所作詩一册予為綴以辭有云士生今日必窮乎源流正變而後詩學乃全風騷炳若日星自不必論漢魏之作純乎聲情而氣骨特厚六朝以降發為體義而文采疊今之為詩者易於古人而難於古人何也不

得乎前此之聲情氣骨而但以唐爲祖本是猶登臺而欲捫天不涉乎後此之體義文采而專守漢晉之權輿是猶踞山而當行地云云此論予久忘之今見梅君尙以列其卷端因節書以記往事自是以後梅君數來乃至日日來雖暮夜雨雪亦來而予詩帙中從此見蘊生不輟矣蘊生沉醺古學必欲探川源嶽脈之精蘊故自六朝以上爲唐人所不能窺見者蘊生一一抉之而其初病乃反在弁髦唐作逮浸淫旣久乃又得唐人之風情氣韻醞釀發揚於是喻開天之殿系風騷實極源流濬合爲條貫脈絡之統成然後表裏胥融一光千徹而

所作亦從此愈進合今古聲情而一則矣自壬午至今予與蘊生互相資益其進於古人者往往爲予所不逮有不合者予亦間爲規之問學之交斷然一室不在標榜也庚寅予詩就燬賴蘊生存其大半殆亦天假夙緣惟蘊生境值支離若必令其合於窮而後工之說帖憂甫闕而半載之中北堂隕樹中饋失羣敝屋數椽又以况歎不能安席乃以隻身就館琴書伴答白雲無繫至如野寺孤僧曩以居署嵇菴豈菴遺而僧去乎詩使之歎遇何爲而然也今自編其嵇菴詩六卷友人爲刊之子更反覆一再讀見其古體尤深康樂或近明遠嗣宗

今格宗壬少陵更薄延清廷碩詩至此難可知矣傳可知矣由是而擴乃室輪滋之絃越八音並適百棗相輝行可見也然則蘊生詩果以窮而工歟蘊生年甫強仕方當和聲鳴 盛遇豈終窮而惟蓼莪之痛莫可更釋觀其野哭集初欲風易其名繼則爲之感慨霑襟怛如身受蓋與予之夢陔如出一息也則予與蘊生詠歌相和涕泣相隨者也詩其謂我兩人何哉道光丙申秋七月黃承吉序

序

植之年五歲先君子口授四聲使日誦古詩七歲命爲五言十歲命學琴出就外傳請於師曰使吾兒解歌詠通聲音變化氣質不庸惡足矣先後受業於儀徵汪退圃甘泉王樹香兩先生年十二能爲古近體詩是年秋病幾死及差先君子加愛憐不使人塾先妣日爭之卒不許終日兒嬉於家彈琴賦詩暇則侍游劇場囂市荒村野廟興至雖風雨必挈往命吟於途歸錄其稿呈之於是自十三歲至十八得詩四卷自名曰趨庭集年十九舅氏謝秋潭先生歸自越州舍於家與先君子至契

見植之善爲詩又曲愛之令朝夕唱酬凡二年又得詩四卷自名曰墅游集年二十一吾友殷君古農以植之能辭賦聞於許樵雲先生先生以弟之子妻之使復爲舉子業自此遂事帖括少吟詠矣丙子武康徐雪廬先生來館揚州植之以前所成八卷者介吳趨顧丈竹筠就質先生遂加許可且規其上曰若者如某若者如某選數百首錄副將爲之刻因是知所學於古者信世有同好庶幾無大謬矣泊辛巳汪君雲溪以植之所書紈扇詩見賞於鄉先達黃春谷先生雲溪因謂曰先生神於詩少許可吾子盍往學焉由是游於門親炙講貫擴

我以廣大引我以精微萬派千源卒歸於依永和聲與觀羣怨之旨歲星一周年已四十於道麤有所聞不幸辛卯歲先君子棄養甫服闋甲午又丁先妣憂乙未室人又亡貧病不支死喪接踵天無悔禍家變橫作門戶蕩焉煢煢一身無所逃命書籍文物飄零四散去年岑君紹周邀余館課其猶子始有食宿之所我友寶應劉君楚楨與同邑王君瓚華督令急錄稿本楚楨已代錄一通藏諸篋而瓚華爲余刻因檢前所成八卷者已散失過半乃合續作叢雜鈔之僅得五卷名曰嵇庵集嵇庵余故屋鼓琴處所自署者也錄稿旣畢又以哀傷慙

和庵詩集 序 二
但死生不得之不能已於言而無父母之可呼天之可
問者成一卷爲野哭集雖其名爲孔子所惡而余實當
之自念身世貧窶又負性剛木懶放雅不喜曼聲側豔
及飲食徵逐之詩又不諳投版曳裾揖拜軒冕之習終
歲閉戶訓蒙苟活風雨數椽籠頭破帽興感發詠勞者
自歌無所成名自計已決惟不敢上負親師之恩與友
朋講習之誼謹序顛末或有覽者爲工爲拙所不計焉
道光十六年丙申春二月十五日梅植之自序

清故貢士梅君墓志銘

儀徵劉文淇撰

君諱植之字蘊生姓梅氏祖諱訓自宣城徙江都考諱
徇積德在躬鄉黨稱長者幼孤育於其舅范氏范以爲
嗣及長娶於黃生子某卽以之繼舅氏後而已歸宗繼
娶於胡乃生君君年十二已能爲古今體詩二十學駢
麗之文博覽經史工書善琴而所嗜尤在詩性簡傲凡
鄉里先達及流寓名公有所招邀未嘗輕造其門必歷
久知其學實勝已乃執弟子禮事之朋輩所心折者僅
十數人視世俗齷齪之士蔑如也家貧無書所讀經注
及古文詞率手自鈔寫偶購舊唐書殘本展轉借全帙

錄之二旬而畢余交游中多勤學之士其最攻苦者甘泉薛傳均子韻於百憂中手不釋卷儀徵汪穀小城病至咯血誦讀自若而君實似之君中歲疊遭考妣喪未除服而妻許氏又卒家室蕩然其愁苦抑鬱無聊賴之狀一寓於詩余每不忍卒讀勸其少輟君諾之而莫能改然君卽不事吟詠而所處爲生人極艱身非金石摧折之斬艾之欲求無死不可得已余固憂君之不永年也而君竟以肺疾卒悲夫繼娶黃孺人結縭甫七載生男女各一皆不存歿之前夕新舉一男君猶強撫視之名之曰毓曾未匝日縗絰一襲加於文裸嗚呼可哀也

已君由揚州府學增生中式道光己亥科舉人生於乾隆甲寅六月二十日卒於道光癸卯九月二十四日春秋五十卽以其年十二月二十日葬甘泉縣施家沖耐其考慮士君之墓君詩近體主少陵古體則導源康樂駢文宗江鮑而參以庾徐哀艷散行文亦雅有歐曾矩矱所著嵇庵詩集六卷友人王君瓚華梓行之其續集四卷文集二卷則門人上元黃國華所刻也江都薛壽及君妻姪儀徵黃春熙亦嘗受學於君謂君之學行不可無所稱述伐石刊詞埋諸幽壤以渴葬不能遠求鉅公之文而丐文於余余文何足傳君君之詩文其必傳

於後則無疑也爰為銘曰
 君志之高潔兮飲清風而餐白雪也君學之勇決兮挽
 六鈞而徹七札也謂韞于中宜有所設施兮奚出門而
 車軸折也惟遺編足以垂後兮芳馨其不滅也

嵇庵詩集目錄

卷一

古今體詩一百九首

卷二

古今體詩一百二十三首

卷三

古今體詩九十八首

卷四

古今體詩六十首

卷五

古今體詩九十八首

卷六

古今體詩九十首

嵇庵詩續集目錄

卷七

古今體詩五十八首

卷八

古今體詩七十二首

卷九

古今體詩六十二首

卷十

古今體詩六十五首

嵇庵詩集卷一

雜言

江都 梅植之 蘊生

大道終未聞虛名深足恥靜言撫微躬素心良不爾奈
何出世姿甘以污泥滓豈伊榮辱牽從俗故違已我有
好朋儕家在秋江汜遺我芙蓉花方舟越江水願言寶
清芬深情正如此

寥空氣澄澈湛然天地秋清曠來遠風煩心一以幽仰
觀候雁翔飄颻何所求側身顧落日萬里空悠悠
燈殘苦難寐徙倚夜過半無風桐葉落孤鴻度河漢卽

和風詩集 卷一
此時已殘如何夜難旦我有一寸心淒馨恐銷散美人
期不來相思再三歎

四時相代謝胡爲獨沈吟年來甘寂寞習靜情自深晨
起步階除落葉飛霜林延日眺秋華絙我龍門琴寥寥
水仙曲成連何處尋

散髮謝塵思仰天讀離騷逸響迴孤雲萬里風蕭蕭湘
君與夫人仿佛雲中招龍輶倭以遲靈衣披且飄我欲
從遠游佩服懷申椒俟我崑崙巔歸駕追風驍

迢迢聞漏水一滴一心折可憐此夜心鐵石碎成屑百
念皆迷途亦復太愁絕披衣擁寒衾歎息不成熟

花氣清於水隨風吹我衣相思秋夜長夢與白雲飛旣
去未移時獨宿蕙蘭幃由來夢中路歧途迷所歸

美人如高雲逍遙任風翔廣袖露華滋綵繡羅衣裳容
華媚朝日顧盼含流光貽我頭上釵贈我耳邊瑤我欲
與之去道路悠且長

殘月下疎桐空窗落秋影不寢聞鐘聲吾心已深省念
絕返自然何者爲榛梗相期我古人悠哉杳同領

夙昔務高遠與世殊矯矯吐論驚薄俗高言視天小率
性不知返立身苦不早好風東南來飄飄生野草嘉樹
苟不芳不如寸莖好

對酒不能飲拔劍起行歌歌聲悲且長迴步停青娥雲
疑爲不流水寒爲不波俯仰天地間我如鳥在羅浩浩
陰陽移白日空經過人苦去日長我苦來日多匪謂來
日多愁思將如何

古人去我遠杳邈難爲親所識有遺書言笑亦相因少
小敦夙好耽樂忘宵晨所遇雖艱辛不能改其真藉曰
誤我身豈因頭上巾斯意固怡懌可以謝世人

涼雨黯秋園亂蟻吟四壁客行始歸來歸來殊戚戚心
事如波瀾千迴萬推激我思申夜興無言淚垂滴慷慨
發浩歌起舞唾壺擊

鬱鬱澗底松霜枝半摧伐雲乳滴陰崖蒼龍掛秋骨斧
爲竈下薪何得見突兀清風散寒灰冰香那銷歇

東風雨無止簷溜響愁霖起坐弄絃索希聲緩鳴琴閉
室獨徘徊悠悠厲長吟視彼桃李花撫膺驚我心

少小苦迍邐甘心事沈寂奇好在詩書深情契良覲如
何知識開憂貧反戚戚迷惑苦多端何者救沈溺誓將
返初心稽古曠所歷首陽及陳蔡兩聖殊悲慼於此作
曠觀吾道究何逃

年來懷祿仕射策涉江津材庸屢棄擲自顧亦笑頰延
目眺山川雖奇亦不新問我何僕僕似非能安貧聊將

和風詩集 卷一 三
捧檄義娛我堂上人此竟不可得豈不堪悲辛我亦有
退思守身以事親

人生寄一世相期無百年堂堂白日去飄若風中烟丈
夫貴自立百行那能全良木壞其根雖華實不堅我思
葛藟庇中宵淚如泉

扶疎蔽雲日中庭植高樹東枝摧烈風西枝浥朝露本
是同根生榮枯不相顧好鳥相和鳴啾啾日將暮我讀
東山詩傷哉古人遇

吾生久不達興言念吾祖朝奏明光宮暮歸富春渚辱
身隱吏卒流離亦云苦丈夫雖侘傺清風足千古祇有

嚴子陵同我空山處

同殷古農

杓

游降鶴道院晤長孫精一道士過平

山堂坐酒家看雨

平明出北郭朝露濕草根徘徊過石梁循隴步前村荒
墟少人行蔓草長古原陰陰衆綠中忽見白板門中有
一道士與我談元言向我說嵩華招我登崑崙出門日
已暮杳靄雲氣昏

曲折步修坂騎驢下山趾松栝鬱芊芊蒼烟四山起石
磴橫青蘿少憩欲延佇驚雷動天末滿山飛白雨

賞雨坐茅屋田家酒一卮惟此酒一卮與君斟酌之開

和履詩集 卷一 四
窗望遠山烟樹相參差仄徑下野瀑亂水爭流漸此境
良足樂我心忘所歸

湘神

湘神清淚灑秋露木葉啼風怨夜暮蕙徑蘭皋獨去來
龍車不下雲中路南山白石叢竹春泠陽波濶魚鱗鱗
金堂玉房一時閉鴻龍赤狗遮天垠安得東君大雄劍
揮擢瑤墟開素練招君高駕紫雲輶靈妃笑侍瑤池宴
海水東流浮桂魄蛟虬下伏龍鼉宅願解秋裾動古歡
不理哀絲訴空碧

過茱萸灣

茱萸灣前臨水湄村南村北人家稀深林掩映動社鼓
東風飄蕩吹春衣細草生泥作意綠野鳥避人經隴飛
糟牀臘酒白如乳微醺驢背迎斜暉

追和庾子山詠畫屏風詩

絳殿開秦闕仙臺逼漢宮檐飛雲倚戶池迴浪浮空芙
蓉迎曙日楊柳送秋風會見蓬壺頂雙童駕兩龍
亂竹緣磎密懸蘿繞磴斜蹲崖猿嘯石聚樹鳥歌花帝
女鸞觴醴天娥鳳葆車攜將丹竈火來訪葛洪家
邈邈江陵道濛濛夢澤烟山深恒阻日樹遠直齊天忘
歸疑范蠡不繫想張騫破浪乘風會滄溟卽目前

綺閣青城曲珠樓大道旁月宜憐鏡影花亦戀衣香漢
殿迴鸞舞梁家墮馬妝定知碧玉小早嫁汝南王
地迴娑邏塞營屯票鶴軍驚沙蒙積月斷堞補關雲馬
背琵琶作旄頭鬢篋聞美人旃帳出共道漢昭君
樹擁雕欄黑山橫粉壁青捲旗風蕩柳轉棹水開萍浣
紗來越女鼓瑟罷湘靈看取金隄上年年杜若馨

雲外

雲外瑤笙月下簫好風吹去劇無聊楚臣寶玦湘江渚
帝子明璫洛浦潮無處再投紅芍藥有心空捲綠芭蕉
迷離百曲春山路樹掩雙扉水隔橋

登茅山

滿山生雲氣靄靄換晴色曉雨細霏微野田豆花濕
舉頭見危磴人在飛鳥上亂石凌潺湲泠泠深澗響

紅墻

紅墻迢迢銀漢隔羅衫綵繚新涼逼美人拾翠垂明璫
淚珠迸落珍珠香斜立紅欄向簾語但道巫陽與北渚
燈檠九枝寒影透夢裏吟詩蝴蝶瘦

花陰篩碎鏡光白東家阿誰弄橫竹逗落一天涼夜思
蘭啼蕙泣清湘湄我亦西齋有芳草雨怨風愁至今老
安得辟水靈犀心魚鱗屋裏溫秋衾

和張丙生寄夜坐

搖落秋爲氣蒼茫思不禁寒蛩斷殘夢疎雨碎愁心對
此一燈冷那堪遙夜深撫琴寄同調寥寥餘雅音

謝秋潭舅氏榮卒於吳館人歸其遺篋有琴譜一

卷乃曩爲舅氏手錄也泣題其後

壁上枯弦冷七條雅音無復響寥寥篋中一卷猗蘭譜
猶是羊曇手代鈔

沈寥寒宇氣清激疏越朱弦絕廣陵此夜玉欄杆外坐
滿天黃葉打秋燈

別怨

別怨訴桐葉吟魂入杳冥碧落異香散美人瑤瑟停蟲
響露華白蛾飛燈炮青裁詩破秋夢無處寄湘靈

贈長孫道士

手持白麈尾三載往京華餐玉通侯宅呼龍貴戚家常
扶九節杖高駕五雲車幾過終南路應看玉井花
我曾三月暮江上訪茅君行李空塵土衣裳自白雲目
迷金簡字夢息紫鸞羣逐逐華陽道仙蹤那得聞

過廿四橋登平山堂

宿雨野徑濕暖烟林樹橫二十四橋水萋萋春草生
落日下天末暮雲歸樹間振衣據危磴滿目江南山

東楊季子

亮

月皎皎兮玉宇澹餘暉兮千里思美人兮未來悵迢遙
兮秋水石蘭兮猗猗修竹兮離離望夫君兮悱惻折瑤
華兮陳辭援玉琴兮吹橫竹采蕭艾兮不盈劓臨風兮
浩歌蹇余思兮往復雁噤噤兮南歸歲旣晏兮霜雪飛
亂余情兮如夢縈思多端兮君奚知

題慈谿鄭徵君簡香

勳

尊甫晚橋先生野雲居圖

疊嶂青山合空江匹練長先生棲隱地猶有讀書堂帆
下蛟川遠林深鶴浦涼野雲來往處省識鄭公鄉

秋夜追挽秋潭舅氏

晚風吹暑微夜深鐘漏稀梧桐抗高館星月動秋暉滿
地莎雞響入簾螢火飛西州舊游路幾過淚沾衣

白下送別卞渠眉

賢

秋江清秋水白此日秦淮送行客客去秣陵舟相思
水上樓樓高但見江南樹迷離烟雨臺城路明日思君
別夢長石頭城外山無數

秦淮雜詠

風曳殘蟬暮雨收幾行疎柳白門秋何人更唱金陵曲
江北江南六代愁
雞鳴埭遠漫寒荆木末樓高切太清一帶女墻秋草碧

斷烟涼雨是臺城

羣鳥啾啾喚奈何建陽門外起瑀戈美人不惜青溪別

更請君王玉樹歌

簪井淒涼怨水流景陽宮闕長梧楸可憐張孔臨春閣
不及湖名尙莫愁

都官風度最清華江令新詩數大家恨殺羽書三十六
教人腸斷後庭花

珠箔風簾挂夕曛秦淮秋水碧於雲月明長板橋邊過
誰唱吳儂白練袿

碧雲深樹影疎疎一抹紅樓水竹居正是江南好秋色

天空木落雁飛初

蔣山如畫寫秋光王氣銷沈草木荒多少南朝舊宮苑
銅駝石馬臥斜陽

游茱萸灣山光寺

一路蒼烟接平楚隔江嵐氣淨青山我欲卜居讀書處
誅茅築室茱萸灣

山光寺前舟楫輕山光寺後原隰平頭白老僧諷梵唄
喃喃時作魚山聲

杉皮屋子竹籬門隔林曖曖遠人村小兒扶犁學農課
落日烏犍耕古原

遊平山堂

迢迢八千里山氣走我眉江迴帆飛小天空鳥下遲法
雲垂碧殿靈雨黯叢祠十載丹邱想登高寄所思

秋夜有懷

蟲聲出破壁月色照秋心不是此時坐安知夜氣深疎
桐滴殘露和我龍門琴念子再三歎相思直到今
簌簌晚花落離離草露晞靜觀知物候忍與素心違目
送關前雁孤雲相與飛匡山有之子何日復同歸

重陽哭祭舅氏

登高何處望金閭一任靈巫說渺茫半世死生成小劫

廿年悽惻此重陽招魂正響哀鴻切酌酒偏開野菊黃
記得從容陪笑語有誰甥舅似韓康

送王菱湖游豫章

且醉此樽酒今宵須盡歡燈花垂夜落庭樹響風乾我
誦惜往日君歌行路難悲秋兼送別愁思雨漫漫
攜手津亭側牙樯照落暉兩行紅樹裏一片遠帆飛雲
外小姑嶺蘆中漁父磯清秋好登眺何日賦懷歸

湖上作

漢王廢苑松楸老湯帝離宮蔓草青日暮平山堂下過
流螢千點亂疎星

與吳熙載

廷颺

論書卽贈

皇宏靈神媯與羲負哉爰畫耆首基下規嶽瀆上斗箕
蒼圖綠牒生馬龜帝媯提挈綱與維天驚地闢神鬼馳
紛綸萬象窮端倪暢以昌后與魯姬五百餘禩生吾師
帝墳皇緯徵龜著古曰在昔師姚媯結繩合金欽疏提
書以取夬字曰孳班璜輯瑞奠高卑元黃紳鞞章龍彪
鐫蝸圖華飾俎卮刻雷書雲狀鼎稟典彝麗灼咸光垂
至今煜烈書與詩嗚呼秦政狂而癡剗滅經籍夫何爲
厥咎莫道倡者誰倉鼠之吏丞相斯金泥玉檢梁父陞
篆刻繹石何纍纍是古迹疇潛窺淹雅之士恒悽悲

古文儻復傳於茲誓將逸籀相攀追蔑經侮聖犯有司
曷其奈何弗死之昊帝厭亂秦祚移洵洵楚漢爭雄雌
孝文武成文物治賈董揚馬搜神奇許君祭酒工文辭
六書萬代尊臯比邈恒分隸神貌遺譬如車繫黃金柅
後繼繇瓘邕與芝聲華籍甚如隕坻羲獻懷文起會稽
貴能家學相宗規羣賢韜筆皆猖披狐狸那敢當熊羆
猗嗟靡曼陳與隋風徽不絕如蛛絲貞觀天子神武姿
潛搜妙緒研皇思歐虞李褚襄指麾修明典則如夷夔
墨華流傳神護持雲根苔蝕猶淋漓陽冰篆迹窮毫釐
昭回日月分澠淄漢魏以降疇匹台此言自譽誠非私

羣公既往書遂衰中更十代無人知豈無俗手工臨池
學古空得毛與皮或如文繡衣駢犧或如毀冕冠垂綏
強躋上哲爭妍媸罔知媠母儕媠施精妖魅孽魍魎
吾將一一加鞭笞休哉生逢 明聖期皇圖煥赫流淳
熙真文秘緯農項貽昭爍萬古如噉曦吾將珥筆登彤
墀奈何俗學徽纏縻豎儒嘲詈狂兒唾忍復毀譽同行
屍吾友熙載懷英資蒼麟一角何鬢鬢鏡古不爽酌夜
蠡探珠先得神龍驪倒海傾崑罔憚疲絕鑿遂冥析我
疑隸奇草聖紛葳蕤復嗜篆刻勞刀錐藝巧若此同班
僊况乃愛我如堦篔吾且與子重致詞古云我貴知者

稀毋以駿裏龍文騅下與鴛病服鹽輜毋以閭風瓊樹
枝下隨瓜蔓栽秋籬薄俗漫漶伊胡底慎勿舖啜糟與
醕吾若與子排雲螭同讀大學明堂碑或若與子窮數
奇寂寞耕釣潁水湄仰天而呼歌咿咿不學南山與五
噫軒皇堯舜在今日勉哉學道當斯時慎崇明德當斯
時

次王西御

僧保

自題秋蓮子詞韻

靈犀一點自通神獨蛹孤抽妙緒成省識春濃秋瘦意
王郎方是善言情

消息堯章與易安可憐清側解人難好將一管春風筆

吹入閒愁莫漫彈

全椒郭嶺生

嘉桂

畫蝴蝶花題云牆頭草開得好

紫蝴蝶飛來了余雅愛之戲做東坡演陌上花

歌作牆頭草詩

東風吹綠牆頭草花放牆頭春已老西家飛來紫蝴蝶
飛上牆頭花外繞花外風翻粉翅香遲遲春日下東牆
看花誰識相思苦春夢春愁萬里長蝴蝶飛來又飛去
花落花開等閒度郎似牆頭蝴蝶身妾似牆頭花上露
花落牆頭露已晞蝶飛一去幾時歸殷勤莫過牆頭去
逐我羅幃故故飛

秋蘭詞

秋蘭兮青青綠葉兮紫莖旣幽閒兮窈窕又調暢而氤
氲余憶汝兮念汝愁何可以言申憶汝兮天涯念汝兮
修娉何瓊姿之瑋異竟緼糝於泥沙汝之生也仙靈汝
之性也貞清信湘山之嘉種或澧浦之遺英雖同根之
瓊蕙曾何及乎芬馨含薰匿采藏於深山帝子旣去湘
君不還飄零伊汝誰與汝歡曼余日以流觀惟浮雲之
渺漫余爲汝兮太息願護汝兮不可得愛汝兮何人悄
無言兮爲汝隱泣芙蓉之花懷芳綠池荃蘅之草翹秀
高陂菴蘊珍之若汝反蕭艾而同之豈汝之尤兮恃美

和風言集 卷一
質之娟娟豈汝之愆兮彰異采之便便斯汝生之拔俗
何得罪於昊天曰維數之有奇兮吾今乃知其信然露
瀼瀼兮秋陰雲溶溶兮湘水深沿極浦兮望汝空惆悵
而至今攬余情以糾結汝安知夫余之爲心念一夕兮
九乖恒搔首兮徘徊心煩懣兮忘食又相思兮不來相
思兮奈何夢髣髴兮婆娑慘汝袿以執手願同往於烟
蘿時不可兮驟得余臨風兮浩歌

題畫柳

青門樹樹碧雲流月緒風條跪地柔勞汝一年迎送我
海陵春雨秣陵秋

雜歌

我有龍文三尺劔滿室冰花落秋水乃是軒皇之所遺
燿灼星光夜凝紫軒皇飛龍游上天泉阿鬱塞黃埃底
終南道士踏白雲割去乖龍頭上耳我今繫此腰帶間
酒酣一擊秋風寒落落長歌行路難

儒生讀書嗜奇古出口義軒與三五文章欲共鄒枚伍
滴露研朱究何補陳編盜竊倉中鼠我心恨不同灰土
君不見揚雄之文覆醬瓿餘子何爲謬辛苦

有手不折章臺柳有口不飲新豐酒丈夫貧賤亦肆志
安用黃金大如斗羞與兒曹爭好醜形骸不必如芻狗

何時得返嵩高山嘯歌招我同心友

橫江詞

潮雞三唱鼉更歇吳楚行人曉裝發扣舷我作滄江吟
采石峯頭掛秋月

女媧留得補天石化作山邊燕子磯解識南人重離別
寄書從不過江飛

登鳳凰臺

晨登鳳凰臺悠悠念今古人事一浮雲空聞瑤鈴語

送汪丈青崖

錫紱

還武昌

漢水西南流荆山連大別相見未移時離懷酒腸熱何

以贈遠游明月不可掇何以擬清輝白雪度方潔川途
戒舟艍山原慎轅轍時哉歲將暮卽此孟冬節繁霜羣
物秋寒雲羃山骨睥睨楚天長塵勞用披撇聞昔游琴
臺朱弦汎清絕又聞太白樓新辭互更迭登高擅辭賦
屈宋推前列豈以老將至冉冉壯心忽伊我事鉛槧俗
學困膠結屢爲鷁退飛肯將翮鍛歇歌以贈所親含毫
氣勃發

題吳丈少文

康

鬪魚會圖用韓孟鬪雞韻

良會暢古懽清讌各相待園華纈寒英庭莎綴天彩羣
思吳子膾遂令河伯殆豈容網以漏無使沼斯在謹焉

動刀匕渾如競矛鏃登盤嘗旨否開軒愜爽塏此歌竹
竿嫋彼詠白石磊腴鱗嚮位列薑桂及時改尾莘朱渥
丹鱗寒雪飛醱樽空勇賈餘酒酣氣益倍或調以卵鹽
或和以蝸醢或得雋以作或受罰以餒獻人職肥瘠衆
賓不期給骨且先去乙書豈訛類亥披鱗亦無忌烹鮮
復何罪說楚波滔滔歌風河浼浼棠觀誇登來魯書同
貨賄奚若老江鄉怡然寄湖海釀飲志無荒清談興不
怠珍味聽撥刺新辭賦欵乃高林颯寒飈芳洲續秋綵
可以窮睥睨因之共樂凱挈榼廣庭除艤舟沙岸隗烹
人有屠崩繪者復王宰我詩代染指蔓糝不可采

雪窗雜歌

辛巳之冬日將蜡有氏在日婁在夜玉瑄初調春欲回
白雪如花自天下今年

皇帝惟紀元神功聖德侔乾坤農人來歲喜有麥百姓
飽食皆君恩

十日五日雲不開一尺二尺珍珠堆我今望日如望歲
杲杲樹杪銅鉦來水瓶欲破梅枝折白冷紅僵春不洩
墨池呵凍碾香冰忙煞如來廣長舌

鱗行爬沙落窗紙東鄰西鄰靜如水燒燈照戶雪壓廬
竹勁頭低扶不起天心富人豈惡盈驀然到處如瑤瓊

不須河漢銀沙路此日應將朝玉京

余生行年二十九書劍飄零竟何有無友能如鮑叔交
有妻大似梁鴻婦蒲萄之釀雙玉壺滿斟爲我堂上娛
一笑吾兒有童戲來年多讀幾通書

簷牙滴水如迸珠冰柱五尺長有餘疑是玉龍鬪方罷
從風吹落頷下鬚嵇康鍛竈火無燼管生藜牀徹骨冷
安得軒轅彌明來清夜敲冰詠石鼎

寒夜沈沈背燈坐十指排籤烘不可此時那有山鞠窮
但讀昌黎陸渾火疎樵浙瀝如撒沙開簾滿樹棠梨花
坐中惜少劉義在更與何人賦雪車

通衢長逵如玉壘出門五步折屐齒思得燭龍吐火來
化作春流下江水到處雜還淖在塗我欲出游須策驢
閉門寫罷宜春帖更習山陰快雪書

寄汪曉樓昇楚中

仙人黃鶴樓頭笛帝子蒼梧水上琴我所思兮聽不得
那知之子有清音鶯飛草長思君遠衡雨湘烟念我深
正好春華須愛惜登臨重憶倚閭心

漢陽城闕岳陽樓如此山川足壯游兩岸香風芳杜若
一江春水木蘭舟論交好向聲椒約作賦應從屈宋求
桂子花開定相見與君同醉秣陵秋

題包慎伯先生世臣授筆圖

清影蒼蒼散寒碧風皺秋湖練紋白先生坐授女郎書
窈窕雲鬟侍瑤席明眸善睐含流光脂痕交漬松烟香
低腰取試簪花格釵股參差論短長似能不能解猶未
皓腕擘箋看指臂靈犀一點到豪端不管鴛鴦藕花睡
畫師神妙入虛無顧陸張吳恐未如恰從三尺溪藤上
傳出安吳執筆圖

題便面白蘋秋柳

寒波瑟瑟渚雲流無限烟痕絹素留我有愁心共搖曳
臺城風雨不勝秋

水雲如絮影模糊淺碧粼粼淡欲無湘女不來秋亦老
斷烟涼雨洞庭湖

題李春村聽鶯圖

春村與余舅氏秋潭先生友余
晤白下而舅氏已歿愴焉題此

湖水柔藍波脈脈柳壓濃烟散香綠一篙新漲木蘭舟
百轉流鶯好春曲間關兩岸響東風斗酒雙柑逸興同
如何白也圖中遇轉使羊曇懷謝公

與王西御句生

翼鳳

昆仲石城橋同賦用西御韻

江上殘陽萬里天橋烏幾點下寒烟石頭城外依依柳
搖曳秋心似往年

積雨夜霽西軒月明桐花淒馨時見螢火坐對內

子悠然意深挑燈擘箋相與賦此

皎月澄秋輝涼露散清響停琴下階立目送碧雲上風
吹桐樹花無聲落蛛網欲寐不成眠因之結遐想

和丙生寒夜雜感

寥落星河夜未央卅年心事獨茫茫雅歌枉自黃鐘律
錦字憑誰玉尺量李廣難封原是命侯生遭罵豈因狂
牢騷譜向龍門曲恐碎崑山叫鳳凰

莫漫悲涼負氣豪劇憐燈火寸心勞董生何日陳三策
潘岳中年感一毛枕上清鐘山寺遠窗前寒月玉輪高
蕭條剩有孤懷在晞髮臨風讀楚騷

庚辰春焦君虎玉

廷琥

以便面索余書落葉賦書

成而虎玉已歿復題一絕以歸諸嗣君瘞墓側
焉

蕭蕭落葉冷寒雲紙上秋聲不可聞何日墓門披宿草
自攜樽酒哭徐君

題任香海停琴佇月圖

我抱嵇生癖蕭寥二十年不逢天上月常秘軫中弦之
子竟同調孤情亦邈然何時泛滄海相與問成連

平山堂望江南山色

躡屩陟層巔天風吹梵唄蒼翠杳難分松楸儼車蓋虛

和月詩集 卷一
堂構雲表俯挹江如帶參差青芙蓉明滅倏蔚蒼疑睇
矚金焦高下沒烟靄莽莽不可求蒼然接吳會側想西
南峯峩峩隱天外不因凌絕頂安知出塵壒

燈市行

瓊樓幾日吹陽管東風散落春城暖未及元宵已市燈
殷紅倩綠街衢滿迷離五色爛生光車馬駢闐一路長
珠樹丹蓮互開合蒼龍紫鳳分翱翔須臾海市兼蓬島
金碧樓臺何縹緲共訝天開不夜城是誰人種宵明草
鏤雲裁月妙天工羽葆珠旌降碧空赤雀遠疑銜曉日
仙娥低若舞迴風爭奇競巧誇精緻綵線金縑闔門繫

茫茫人海共摩挲就中獨數新裁製不惜黃金鬪麗華
吾鄉侈靡古無加合須摘取天邊月留照揚州百萬家

元日喜見瑞雪

未醒屠蘇酒飛來雪色新歲華今日早膏澤萬方春遠
氣橫空積寒花入戶頻不須憐臥客歌詠樂嘉辰

訪冶春詩社遺址

虹橋新漲碧淪漣漾著詞壇此地傳簪紱文章扶大雅
鶯花尊酒結前賢萋萋草色留寒照裊裊楊枝散暖烟
太息風流誰繼作春波幾駐木蘭船

杏花爲風雨所摧感賦

狼藉春無賴空庭碧蘚滋一年方見汝何事易離披月
但餘孤影烟堪護舊枝愴懷猶故我幾誤摘芳時
揚子談元室東風幾度新飄零殊太早寂寞不成春空
復芝盤石何來燕昵人蕭蕭墻外竹應共爾相親

解謗

君看古來文字交是非謬戾如牛毛屈平辭賦子雲易
不免下士相詼嘲鳳凰上擊九千仞瓦溝亦復棲鷓鴣
請觀物性用自慰胡為悒快心怱怱

李練江澄熙載招同泛舟雨阻未果

蕭索意無賴閑居賦未曾林花飛晚砌檐雨濕春燈折

簡招吳質維舟負李膺湖山幽絕處何日與同登

小坐

小坐浮游息無營得靜機雨將驚夢碎花欲挾愁飛故
紙如相伴朱弦且待揮已知塵事苦不忍素心違

奉酬黃春谷先生承吉聽琴之作

太音何微茫遺器有琴瑟工師習搏拊尋聲不尋律學
士考鐘呂揮手苦拘窒茫昧談宮商楚囚笑非匹絃徽
泥度數君子賤其術不知夔曠心神明賦桐漆虛無辨
雅鄭知者求其實由聲以造形情狀粲然出或如山崔
巍或如水汨滴雲雷爭喧阗驚飈欬飄發埃戍警邊霜

姬姜泣秋月萬變須臾間朱弦見恍惚乃知天地心有
動物咸達繫余幼肄習手指困鞦韆循聲追古初廿載
始超越窵窵渾穆中有感不可遏血氣和且平真響斯
軒豁嵇康及陶潛二子殊清絕要知廣陵散無弦謝天
伐我志耽希微未敢惑羣說望古聆天鈞悠悠恒抱膝
夫子擅神聰論樂識通脫雅歌示我讀古心澹淵沕恍
聽園客絲鏗鏘互更迭萬壑松風虛寥天何空濶元妙
寄聲籟無言悟懷葛余技慚雍門徬徨獨心悅何時抱
枯木拂石奏白雪相與和天倪一息情怫鬱尋我海上
師辭家泛溟渤

小園八月桃花

記曾識面太匆匆笑爾靈枝落木中露井無霞春已去
仙源有峽夢難通蟲吟破壁餘疎影蜨繞空樞耐淺紅
爲語傾城好顏色可應寥落對秋風

嵇庵詩集卷一終

嵇庵詩集卷二

杪秋湖上經行

江都 梅植之 蘊生

寒晨展清矚緣湖驚蘭舟迤邐沙隄長窈窕林巖幽霜
飈疾聞空昏晞倏見陬遠峯接隱汀黯黯烟霏收邈焉
緬華春搯兮息嚴秋物賞隨羣遷理愜延余搜摘芳懷
彼姝揮弦對緇流鐘定尋精廬寂歷嗟無儔情去杳誰
思習靜會所留塵勞釋羈勒獨往名山游

破硯

一片羚羊石千秋志士心磨礧圭角盡砥礪歲華深恍

見鸚春浴如聞龍夜吟坳稜雖缺落珍重抵兼金

枕上

夜永難勝日荒雞亦懶啼卅年身似怯百種夢都迷垂
老憂慈父長貧愧病妻愁多思自釋無奈轉悽悽

與天長岑紹周

建功

冒雪遊平山堂

久負湖山約終年坐草堂今茲共攜手聊復逞清狂急
雪迴風晶寒梅破臘香佳辰難再覲詩思入微茫
迤邐經行處銀沙少屐痕泉聲沈凍澀山影入雲昏慘
鶩猶浮水枯僧早閉門敝裘寒不覺沾酒過前村

放眼山亭上天花萬樹開平湖方玉海修榭總瑤臺吹

我乘風去披雲喚鶴來茫茫人世外何處絕塵埃
聞說昆侖頂冰崖疊萬重生平勞夢想此地拓心胸天
遠遲飛雁山虛隱暮鐘與君雲壑賞徒倚對寒松

李靜齋先生

周南

招飲藉圃看菊

百卉齊春榮寒姿結秋菊豈伊性殊異嘉爾抱幽獨自
非靜者觀賞心隨衆日夫子築名園桃李競繁縟霜葩
吐孤芬秋情別相屬丹白影參差窗櫺氣芳馥一一逞
秋容金精綴瓊玉開尊夜鳴琴希聲澹還穆裊裊幽思
深涼風下庭綠

歲暮泛湖感事作

時竟感壯心歲事恒局促鼓枻逞清娛凌邱放遙矚寒
流疊緇漪層陰黯疎木瀾瀾浸澄心依依送春日眷昔
情屢回撫今念又屬願言懷所親芳華閔幽谷舉松旣
危冠拔蘿復蹇足冥鴻翔高雲潛鱗躍深泐乘運本無
礙知命遂求福達哉蒙叟言吾生又安卜

聞李瘦仙先生

天澂

移墓城西隆慶寺側詩莫之

逸翮翔千仞潛鱗沒九淵世人輕老病吾道異周旋書
品窮而粹詩情淡亦妍蕭蕭湖上路墓草黯秋煙

寒夜自述

萬感起遙夜吾生良獨難病常如沈約貧直到袁安壯

志嗟波逝牢愁逼歲殘賦詩聊短述翻覺太高寒

與紹周西御遊雲山閣

素懷眷清遊興發每孤往欣焉際和時矧復結心賞攝
衣窮登陟緩步恣偃仰遙岑開霽陰新萸茁寒莽臨流
傷逝情憇石喟遐想倦彼塵外人珠宮眎宏敞密竹表
林矗緋梅鬱雲上宛宛衆香歆琳琳梵貝響澄觀知有
涯妙義契無象靈域儻不遙何事迫愴怳

桃花

本是崑崙種偏教此處栽根憑卷石護花作斷霞開春
事雲俱遠仙人夢不來無言對芳草蜂蝶漫徘徊

青苔

托根聊復爾生意短墻陰每對芳菲節空勞雨露心蟻
侵隨壁繞簾捲度春深記取蘼蕪路迢迢何處尋

新竹

幸不因風折參差劇可憐畫欄虛冉冉吟榻淨娟娟細
葉含烟卷初梢觸戶偏未應從斫却把釣在漁船

薺菜

乍可同苔蘚胡為滿路隅閒庭空寂寞春意太荒蕪已
分隨榛莽何須論苑枯腐儒甘嗜久翻覺味如茶

奉次靜齋先生聽琴在贈元韻

竹陰瑣碎篩清光簾圍夜宴傾螺觴

簾圍春谷先生園名

主人招

我弄絃索拂拭徽軫蒼巖傍寒蛩弔月散清響風梧曳

露飛芸黃是時魚鳥靜且寂柴牙參差相頡頏身坐林

亭夢天外恍臨極浦浮瀟湘余生侘傺類楚客牢騷鳩

叫秋蘭芳琴操南音嗜成癖却宜八月彈清商嵇生不

作戴生死音均誰復知低昂古心自鞭獨渾沕廿年未

信筌蹄忘夫子審聲磬妙覺希微入耳神飄揚雲韶九

變雅歌作靈鼗雷鼓非尋常南厓先生合有贈

江丈南厓嘉樹

並有贈句惠施真解同蒙莊鏘璆金石互賡答須臾碧月沈

西廊遷坐罷操綴蔓句如聞牛鐸聲郎當

漫吟

腸內車輪轉中心無停時輪轉各有適心轉何所之青
青道旁草璨璨瓊樹枝榮瘁固一世何能待來茲昔日
吳宮蠶變爲寡女絲彈作履霜聲惻愴聽者悲微物有
至性無知爾何爲

人子欲養親父母忽已老輾轉百憂集事事驚懷抱及
時無所娛此後皆枯槁功業與文章虛名竟何好悠悠
方寸心知我惟蒼昊

題西御秋蓮子集

吾聞策千里之馬不如乘下澤之車操軒轅之琴不如

吹齊王之竽宋人寶礫梧臺側卞和泣玉荆山隅與世
浮沈混美惡丈夫未必非良圖君有奇才八斗儲珠璣
璀璨青珊瑚胡爲落拓甘窮途人或笑其狂而我惜其
愚卽令摛錦布繡炫心而快意會與吾身何補於錙銖
讀君之文三歎吁東西南北各有適吾儕跼蹐將焉如

和西御詠鷹

未極游天力空教迥出羣高風盤大漠碧落點秋雲奮
擊伊誰効飢呼祗自聞世人齊物論那與鸞鳩分

哀劉烈女辭

寶應劉氏女爲應氏童養媳未迨吉而夫病女

割臂月前煎諸藥及夫死舅姑憐其少欲改字之
遂投水死

吳蠶初作繭軋軋成朱絲朱絲彈出寡女悲寡女之悲
尙可聽烈女之悲誰聞之女時髮覆額得上君子堂少
小無嫌疑舅姑相扶將當時見面雖爾汝已知生死毋
相忘願爲西山鷄乘風共翱翔願爲東海鰈與波相流
浪貞松白石空自誓不道君子罹其殃君身已死妾何
望魂魄欲從求無方此時妾生不如死舅姑愛妾恩無
已舅姑之心仁且慈妾心有志那得知此身已爲應氏
婦此心羞爲他人妻梧桐之枝鴻雁翼生也相親死相

得湖水茫茫夜深黑嗚呼烈女悲無極十年多謝舅姑
恩明朝殮妾秋湖側

奉酬汪飲泉先生

潮生

深宵刻燭坐談詩酒氣花光爛熳時如我蕭騷宜物議
知君風雅是吾師畫工不讓徐熙筆樂府還傳李白辭
一幅蠻箋長句好聲情宛轉和朱絲

和春谷先生楊花曲

二月已過三月來楊花歷亂趁風開無情有恨離還合
吹入簾櫳去復回輕輕貼水嬌無力點點依人拈不得
依人貼水總無聊點點輕輕可憐色游絲百丈挂楊枝

黏著楊花不肯飛飄揚鎮日空何託搖曳當風不自持
幾人繫馬章臺路幾人送別蘼蕪渡蜨影蜂聲太懊惱
離情百結相思樹傷心莫漫怨楊花黃鳥西飛白日斜
恨粉愁雲千萬里春光狼藉滿天涯

擬行路難

佩君倚天之長劍服君飛雲爛日之霓裳坐君珍臺雕
堂清宴之間館酌君蘭薰雪白帝女之瓊漿瑤華落地
同蔓草美人白髮非紅妝勸君少徘徊聽我歌慨慷行
路之難古所歎無時無地無年無月無日無夜非九折
之羊腸

遠慮與近憂飲酒逕狂醉世上豈無千日醪何人能得
醕酣睡出苦復入愁馳馬縱長轡世上豈無千里駒何
人不在天地內飲酒馳馬不稱情吾亦知爲偶然事丈
夫三十無位置何苦低頭獨垂淚行路難行路難心如
碎

洛陽城東一株柳年年折向行人手露葉烟條禿如帚
中有好鳥名黃鸝歸飛切切枝上啼一啼烟漠漠再啼
風淒淒金衣雛襪自來往惱殺高樓蕩子妻人生異地
異哀樂不如閉戶甘蒿藜

君不見崑崙之山高極天世人遙望空雲烟置身一萬

一千里終南太華小如拳駕我飄風六翮之元鶴挾我
童顏不死之飛仙尻輪一去逐奔電王母夜讌華池邊
珠樹作花大如斗紫鸞戲舞風翩翩還丹未成白日暮
一時淚下如秋泉君看王喬與蕭史豈有垂老逢仙緣
桃李生路傍花開厭人顧蘭蕙在深山花落少人遇豈
無梧檟溷荆榛每見麒麟逐狐兔長安紛紛多少年瓊
琚玉珮登雲路采筆朝披蘭殿香錦袍夜濕宮花露問
君何爲得至此共說辛勤究章句不知頭白子雲猶著
書落拓相如徒賣賦

一簣之士不可以栽松尺澤之波不可以藏龍大海蕩

蕩水所歸泰山巖巖嶽所宗請君載書泛溟渤挂帆東
指蓬萊宮穹龜高竈躡躡而徑走安問天吳罔象之熊
熊乃知車輪馬跡大行道阮生所以悲途窮

嘉樹植園中未曾作花先有枝男兒生世間未曾解笑
先有啼富貴貧賤任所遇此心胡爲恒慘悽有酒不飲
愛惜費知者所鄙愚者嗤夷齊景公同一死問君死去
何所知

翩翩雲中雙白鵠飽自高飛飢啄粟一朝爭食各飛去
不惜離羣但果腹何來咬咬黃鳥鳴如求友聲出幽谷
同生同翼且乖違何況爾輩非其族

吹我無孔之笛彈我無弦之琴拊我無革之鼓發我無聲之吟青春晚晚倏已暮落花紛紛辭故林章甫之冠售斷髮崑山之壁抵飛禽古人不遇尙如此誰言結契輕黃金

君不見東家少婦三月時采桑南陌畏蠶飢育蠶作繭抽新絲梭聲軋軋窗中機衣垢不能澣綠鬢如蓬飛豈料夫婿一朝至入門喚婦聲如雷強開繡閣飾粉黛玉容雖笑中心摧夜深伏枕淚如雨悔不當時學歌舞斲木爲車輪東西南北隨沙塵自我有此身辛苦悲怨難重陳我昔與君初結納意謂膠漆無比倫十年不相

見曠若越與秦車馬蹠蹠來言笑非其真愛我慰我過夙昔意氣落實非所親豈以君爲青天鴻翻令我爲濁水鱗古者張范之交間世出未可徧望尋常人

朝亦無所嘯暮亦無所歌入亦無所適出亦無所過長繩不繫西飛日蘆灰難止東流波人生萬事本夢幻百年一擲如飛梭洪崖偃佺棄我去所思不得心如何愧非仙才謝真籙亦復中道傷蹉跎

旣不能挾雕弓馳怒馬手接飛猱獵廣野又不能騁雄辯濡飛翰踞陳大策呼天關復不能業削酒市胃脯工數錢刀洛陽賈屈首殘編究何補商歌金石皆辛苦無

怪顛愚笑儔侶君看馮婦爲善士畢竟還能搏猛虎
一言告君君且寬君聽我歌行路難何處草木地無棘
何歲霜雪天無寒賈生不必湘水哭馮煖胡爲長鋏彈
勸君且加餐窮通得喪天所安君若坎壈於邑而不已
幾見鷓鴣雁鶩接翼於鸕鷀

苟可以燕息不必洞房苟可以曳婁不必鸛鷀苟可以
飽飫不必膳腳苟可以遨遊不必康莊天地四方甚寥
廓我身在世猶糝糠聖賢凡愚難計數我生在世猶螢
光仰天大笑亦兒戲旣無憾乎薄薄復何問乎蒼蒼
海氣鬱晨霞爛然錦段天之涯須臾飄風土囊口滿空

白雨紛如麻造化變見本恍惚君心胡爲久咨嗟昔者
韓非著孤憤自謂點畫無以加秦皇覽誦恨見晚詔書
催迫登公車圭璋未達刀鋸及霜風吹落雲中花請觀
萬事無不爾不如學種東陵瓜

君不見漢宮雙金莖乃是五利藥大之所營茂陵一去
不復返但見仙掌高濶魏官牽車鼎門外銅花泣淚
交盈盈人生肝鬲豈金石有誰棖觸能忘情

白雪之潔有時而汚大椿之壽有時而枯飽食嬉游本
非吾徒涸轍之呼或笑其愚人無情於往來魚相忘於

江湖

和風詩集 卷二
啁啾晰晰者爲網罟之禽淒淒切切者乃短長之吟到
眼青蕪換春色轉頭落葉飛霜林俯仰上下但艱脆坐
使青天白日沈我歌行路難無人知苦心夔涓牙曠久
不作茫茫四海將焉尋

夜坐

深宵羣籟息幽意滿疎楹有覺欲無睡永懷難寄情竹
風捎影動桐雨滴香清試取鳴琴奏朱弦緩不成

索楊次雲畫海上鳴琴圖

近來歌嘯劇蒼涼夢想鳴琴海嶠旁安得凌兢關董筆
一槎寫我在樽桑

題便面芍藥

妙跡徐黃筆一枝澹紅香白影參差憑君懷袖當風處
寫出天涯古別離

熙載句生業疇人之學詩以贈之

珠聯索貫互昭回紫氣祥光疊去來笑我真同窺筦見
知君妙擅挾天才張衡制度煩推測李播文章陋剪裁
清夜覽空從一望碧雲何處是三台

綠竹

冉冉青沾薜荔墻嫵娟修竹罨虛涼午風入戶簾垂地
斜日當檐鳥下廊遠道尺書來渭北美人瑤瑟去潯陽

石欄倚徧渾無事愁絕天寒翠袖長

病中述懷呈春谷先生

小病渾閒事關心是老親艱難羞壯志蕭颯廢吟身思
與泉流冷詩如藥物辛秋來防瘧疾寒熱幾迴巡
細雨新涼逼微軀弱不經檢書思欲睡染翰惜無靈曉
籟聞風鵲宵光數露螢十年餘一榻穿處草痕青
屈宋開天手潘顏百世師室堂勞自度疑信證誰知快
睹龍文煥欣聞鳳律吹清規崇 聖代焉敢廢吟詩
瓠落真無用清狂獨自憐嘯歌徒四壁夢想正千年末
契邀前輩高文共冥詮病身殊感激猛著祖生鞭

戴燕孫

本貽

招同方琴甫泛湖

日落清波面秋湖好放船碧烟籠細柳紅粉墜丹蓮曠
朗疑無地澄空別有天賴君開病眼始覺困經年
傑閣雲沈樹長橋水沒隄名園游騎絕歸棹野漁迷鷗
鷺翻風遠菰蒲曳浪低晚寒羅袖薄涼影碧淒淒
積雨高空洗遙岑點翠螺松杉浮遠嶂星月浸秋河物
候清暉轉吾徒野興多何當弦望後重聽采菱歌

病中題韋蘇州集

宵深坐聞柝萬感寂已幽清風動閨涼素月暖天流物
序倏變遷大化不可留繫余病七日苓朮未云瘳旣覺

支力勸復苦心煩憂夜展韋公詩挑燈試吟謳清沁入
肝脾五字真難求如聽朱絲絃疏越和且柔賴公療我
疾扁跗焉足儔

夜懷紹周

暗蟲在壁夜未歇疎燈照戶曉尙然已將身世置度外
忽復幽憂到目前何處遠鐘來一一隔簾殘月露娟娟
懷人臥病年來事只覺終宵不得眠

論詩絕句

人籟端從天籟生伶倫吹律協中聲延陵觀後 尼山
正述作由來本聖明

太史輜軒久告勞奇文鬱起在離騷女蘿香草孤臣淚
日月經天華嶽高

天馬蒲梢樂府開果然漢武是仙才雲門昭夏鏗鐘鼓
不獨新詩詠柏臺

鏡吹偏宜合短簫不關奇字欲聲調翁離朱鷺求通解
任是豐干也舌饒

河梁五字冠西京聲律精嚴抵用兵誤著戎衣行朔漠
枉教忠孝掩詩名

峩峩天山塞草黃邊風吹節走羝羊臨河一賦征人怨
愁絕哀笳萬里長

子桓才藻亞陳王偏與辭人角短長果是文章輕富貴
燕歌七字冠齊梁

日夕臨波賦洛神傷心其豆最艱辛可憐建國同遷斥
不抵詞章侍從臣

少小離家賦遠游不堪回首仲宣樓從軍未入黃初紀
耻說功名我后求

二陸淹通正少年聲華入洛不虛傳緣情但覺工雕組
堪與河陽步後先

黃門哀悼劇堪傷兒女情懷太不忘可惜風流易憔悴
年華未暮鬢先蒼

疏懶心情逐垢汚手揮目送雅音無養生既有神仙術
猶觸驕王法網誅

阮公發興每無端醉向窮途哭更難一卷高文寄騷雅
真源自在與誰看

慷慨難言詠古篇英雄自昔有迤邐莫嫌傖父三都賦
到底功成十二年

奇思幻誕託游仙水碧金膏事杳然山海一編真奧博
注來端不讓詩箋

彭澤清風薄太虛如何宗法本應璩生平實事耽求是
遂使兒曹不讀書

慧業由來具六通延年何必強齊同春江萬里風濤壯
爭及虛舟溟漲工

謝家文字最知名江左風流少抗衡一夢誰教傳好事
果然春草賦難兄

顛倒青蓮拜後塵元暉詩思極清新餘霞散綺陰霞沒
工拙由來待解人

牢落悲歌行路難參軍俊逸冠詞壇卽看小小推能手
直使奇才突建安

擬軸篇篇繼謝公江郎采筆吐長虹妍媸互見真優孟
恐與臨川較未工

高論風生老斲輪鍾期識曲聽來真何緣空執臬陶律
疲茶臨文恐不伸

離亂哀歌庾子山傷心一賦鬢毛斑豔辭屬對工堅勁
風格初唐四傑間

戎馬倉皇六代多北朝文士少詩歌雲峯山似寒陵石

幸有磨崖字擘窠

魏鄭道昭登雲峯山五
言詩曾讀磨崖拓本

王楊盧駱當時體無限聲情樂府遺不信斯文在開寶
操觚兒輩已瑕疵

拾遺高義薄雲天淵雅冲和沈宋先感遇幾篇真絕作
却教直出李青蓮

蛾眉謠詠最憐君隴月邊雲慘不聞比似論才如論戰
更誰超乘李將軍

少陵詩句若江河古義微茫近體多識得風騷原寄託
紛紛箋注督如何

羣雄林立數開天儲杜高岑直比肩佳會慈恩題雁塢
法門龍象賴諸賢

清詩句句妙無痕月夜乘舟過鹿門韋布高名達聰聽
一言也算抵深恩

維摩觀世藐秋毫纒瀨歆湖息物勞文士每多材藝累
悔教苦學鬱輪袍

豪氣銷除老似僧左司五字最清激鐘聲樹色空千古
記得扁舟過廣陵

性道文章踵孟荀六經微旨獨精醇自公辭訓工深厚
誤却蘇黃作替人

辭華潔淨未精微黨入韋王萬事非十二雅歌真典碩
金雞何日柳州歸

清苦吟詩賈浪仙疲驢策策劇堪憐不因遭際瞻山斗
何事能參文字禪

月蝕新詩怪絕倫任華以後僅斯人風騷到此悲漸滅
未識何因作茗神

牛鬼蛇神太好奇新歌豔斷苦勞思縱教天與通眉壽
奴僕何能命楚詞

白傅詩篇老嫗知泥沙金屑苦難披樂章雖好如謠唱
爭及劉郎賦竹枝

編珠綴玉逞浮夸折齒難忘是狹邪豈有麤疏傲天子
尙云誤讀在南華

紛紛獺祭苦搜尋翦綠裁紅頗用心從古微文難會得
斷無錦瑟少知音

王官谷裏坐談詩不見司空絕妙辭二十四評會未得
此中辛苦有誰知

湖海文章氣象雄天才卓犖憶坡公一生蹭蹬多疑獄
豈爲詩工遇始窮

剛復談經學未純垢衣蔬食少天真不應徧選三唐集
獨信青蓮是酒人

談詩我昔愛滄浪禪派分明說最詳高妙自然參上乘
幾人著眼是金剛

祇有遺山善論詩宗風不絕若蛛絲眼前虞趙皆溝漕
滄海橫流待阿誰

文人鴻筆數高劉汲古都從象罔求若論驪珠誰在握
青田久已讓青邱

何李登壇亦大家當時高製爛雲霞若教量入黃鐘尺
不止荀郎半黍差

殘篇佚句苦爬搜無異魯魚木上求玉牒卿雲兼撰出
竟將贗鼎賂齊侯

哀豔歌行最可憐詩書過眼若雲烟悔將庾信堪師法
到死方知不值錢

日月光華紉縵雲 熙朝名士總懷文南施北宋如驂
靳畢竟漁洋卓不羣

延壽精思著易林說經餘事託謳吟誰知造化鍾詩魄
早向興安折素心 造化鑄詩魄一官遠南征焦里
堂先生懷春谷先生令興安詩

鴻裁騰蹕邁高王 高青邱王漁洋 萬戶千門擬建章天愛斯文

續騷雅一官能不去三湘

箏琶琴瑟各調絃誰使茫茫雅鄭傳海水天風何處聽
此情久已待成連

雞鶴從來共一羣如何攀附恥聲聞太元不是君山讀
那怪當前失子雲

秋夜雨窗再題韋詩

澄思湛槃水詎假物推送古人去無質欣憾杳誰共聽
雨臥空窗泠泠破秋夢

題姚後陶詩集

姚潛字後陶前明廷尉姚思孝仲子為歙縣諸生甲申後棄舉業遷揚州少時妹家為讎人所訟陷刑部獄後陶破產奔走數千里贖妹氏及二甥歸江南妻死無家為曹棟亭客與程穆倩陳其年友善年八十五卒葬京口爛石山有詩一卷雅健具中唐風格

詩情老去甚高閑比似程吳季孟間

程子孟陽吳野人

任俠那知

過郭解在教詞賦動江關

寶應劉君楚楨

寶楠

奉其師張趙亭先生初蘭圖

遺像屬題

側想張文伯靈芬滌素襟披圖初楚佩如聽碧天吟
 沈秋將暮蕭然風滿林清蹤傳弟子空賦大招尋

登平山堂還瞻湖中作

循闈步修阪陟級窮高隈躑躅肢未勑矚矚心始開
 昔情固遐喟茲游復長懷明滅瞰江峯縹緲凌煙臺
 微陽鏡澄波窮陰帶寒萊聆虛警清飈延遠翳紛埃
 感會念已憾浩歌意彌哀待年蓄盛藻訪道非仙才
 探幽欣與同達化妙所推逐影候歸禽墟里昏森霏

桂之樹行

桂之樹亦何青青我攀桂枝無與同行宵月之光乃麗

於魄燭火之照不及夜屋我有旨酒飲我山中之人我
有鳴琴可以和神不如乘堅車策駟馬飄颻隨風率彼
曠野臨流而漁獺或笑之鳳翔高冥驚爾怪鴟事各有
適衆以爲欺躡屩於雲山之顛追王喬尋僮佗攀桂枝
兮淹留與子期乎萬年

西牖雜述

西牖餘斜日暉暉逼歲殘光風迴蘇壁晴雪溼花欄攬
鏡憐形影停杯奏苦寒長途吾未擇不是誤儒冠
擬棄班生筆仍慚賈傅書及時須踈策何日許登車坎
壘羞彈鋏功名恥曳裾聞雞繙故帙燈火夜窗虛

聽徹高城柝星河隱戍樓瓶冰寒水玉風犯敝貂裘璞
自荆人獻珠誰象罔求十年墻回立未信短曹劉
酒醉天教飲詩狂性所鍾市人恒畏虎吾道豈猶龍夢
折山阿桂心枯澗底松深宵看劍氣秀出紫芙蓉
一經猶未達苦被二毛侵破曉雞啼戶先春鳥啁林幾
年牢落感獨自短長吟天驥從誰策空閒萬里心

今夕行

考鐘按鼓懽樂陳主人延上坐請聽賤子今夕言我昔
別君去東到滄海西過崑崙南越朱崖北超元門明珠
百斛棄不收琳琅之壁輕如塵歸來閉門學樹木東西

南北各各樹千百棗栗羅前軒梨桃垂後屋啖我一李
其與幾何食者見惠枯核繁多尙復與君游清池爲水
嬰網罟密積亂荇藻不知驚起雙鳧飛

除夕

東風入律春將至北斗橫天夜未闌往事漫隨鴻爪變
壯懷須付酒杯寬耕無代祿師長統坐已穿牀類幼安
只有梅花檐向好半窗清影與高寒

嵇庵詩集卷二終

嵇庵詩集卷三

江都 梅植之 蘊生

元日

絳蠟催寒夜春窗轉曙光鑪熏沈甲暖杯汎紫芝香事
與年爭進心隨日併長撫躬慚學殖何以慰高堂

元日又作

卿雲容裔靄層霄 絳闕清居入望遙臘氣搗殘長夜
鼓暖風吹徹半城簫擬驅鐵馬收西域未著朱衣事早
朝儒術及時思報國揚雲終不抵班超

與紹周游玉清宮聽龔道士彈琴

神宮闕城闕清士解絃歌顧我耽琴癖希聲入指和仙
壇翔夜鶴香沼泛春波歸步丹林月依稀夢裏過

送春谷先生入都

春水泮河側夫子賦遠游僕夫整行駕問言馳 皇州
調風送輕艫纖埃翳華輶戒塗且勿亟尊酒敘綢繆
綢繆數載心顧我情極深仰瞻未能及感激會成吟曾
是儲素寶世許甘陸沈 眷注天所欣離思我難任
我離詎幾時一日遠如期及茲今夕心杳同千里思傾
想神已勞贈詩難爲辭言約候歸軒夏首返 京畿
夏首序易遷撫時情更延此計春草萋還念山櫻然近

光天已承布澤物待甄翹佇聆嘉言示我

帝京篇

喜晤海寧高萍客

桂

記取秋風別三年始見君鯉魚空復爾鷗鷺每難羣夢
逐滄波遠書從海嶠聞相思寄明月惆悵隔南雲

柬紹周

匝月音塵隔驚心物候違桐花檐向落螢火夜深飛習
靜空危坐忘情詎息機思君對芳樹彈徧十三徽

紹周與余相尋不值

相見渾無事相思各自深我方憂未已君復病兼侵心
苦堪勞瘁愁多廢咏吟豈知歧路錯兩地誤招尋

並無千里隔有會輒經時尙復同鄉里真如遠別離浮
文延譽重頻諾見心期念子如流水悠悠不盡思

秋感

勞生固多端達者詎能遣習靜會思深驚情辨時轉露
蟲引秋吟涼螢散星點中夜起長歎我心不可卷

題句生詩集

病耳厭箏琶朱絃聽者寡之子敦古初高文證騷雅繼
軌遵前途鞭心絕外假君才不多覲詎出古人下
余幼耽空文望道苦無進軼氣薄天澄深思察泉定翳
念蔽心魄萬疚積銖寸知文喜晤君亟與叩宗乘

秋齋病起作

積疴感宵晨幽居憺愁瘁矜名數有待習道理無味開
軒納澄氣湛思恣清味宿露蘊寒姿輕颺轉深翠循虛
警聲籟乘節獻妍媚因生物共息在化命自遂妙覺誰
與滯懸解固無悖反觀如可求欣憾等一寐

病中聞萍客歸里

相見何時又自歸欲留無計意多違十年作客雙蓬鬢
萬里還家一布衣艣拂江波隨鳥去帆開浦樹逐雲飛
秋風病廢身無力夢向津亭送夕暉

秋夜雜述

時耳忽聾

木落驚庭翠花飛惜檻紅殘燈恒夜雨高館又秋風多
病嫌身懶忘情任耳聾自知無怪事不復強書空
秋陰偏不散節候總非常頓覺羅襟重仍愁葛帔涼亂
蟲吟斷堵寒蔓引深堂鎮日心如水平秋情自渺茫
已分甘幽寂生涯任去留元蟬辭木末別燕顧簾鉤阮
籍空耽醉張衡漫賦愁感時難料理詩態不能休
狂作千年想含毫恐未安窮情知疢疾盡力涉艱難玉
尺憑誰擬朱弦獨自彈寸精開造化夢醒一燈寒

薛子韻

傳均

招同劉孟瞻

文淇

楚楨楊季子包孟

開 慎言 家起

興言

家丞

興實

昆仲秋日湖上

嘉會何由得蕭晨愜快游亂蝟嘶落日疎柳曳殘秋君
等儕雲鶴吾生愧海鷗相期各千古無忘此同舟

九日與上元金柳塘

玉豐

六合戴雲軒

文燦

其子

君植

廕培

游禪智寺

步入招提望山光碧樹秋亂籐懸畫碣寒鳥聚經樓歌
吹空陳迹登臨慨勝游茱萸灣外水日夕自西流

和句生九日登南樓作

輸君此日獨凭欄雲樹蒼涼放眼寬鐘送歸雲僧寺晚
天垂遠樹女墻寒九州擬作登高賦十載空彈處士冠
笑對黃花如我淡霜枝何得怨摧殘

和孟瞻楚楨九日會諸公游西郊

秋晨展游眺接襪愜招攜披文覲登陟卽事悵乖違遐
睇躡崇邱緬眇窮層隈霜風革高節雲物涵清佳野烟
冪遙村疏畦繡寒萊仰聆候雁馳俯際時菊開適境緣
延思眷情抗古懷角藝慚非長敦德詎可儕望表夙有
欽逐景願無睽寄言二三子勗哉勵所齊

和春谷先生寒鴉

逐隊鴉飛亂秋情入渺茫寒聲催葉下墨點破烟長日
薄山樓側霜霏水驛傍莫矜雙鬢好愁絕望垂楊

夜坐

氣薄苦辭酒愁多欲廢詩有時逢泥飲無術解深思萬
事同泡影中年感鬢絲莫因蕭瑟甚強對菊花枝
一寸燈餘壁翻驚月出光夢迷隨枕錯心亂入更長黠
鼠跳寒案荒雞呪短墻病身殊輾轉霜氣逼藜牀

久不見紹周

吟情難住著落日掩荆扉問訊欣無恙翻嫌慙不歸湖
風吹短鬢寒葉墜秋衣惆悵霜天雁飄颻獨自飛

戲賦四首

一寸精靈萬象探無端憂樂待誰參中天斗柄高懸北
萬古璣衡正指南多事負書干沈約幾人覆瓿對桓譚

朱弦雅進升堂瑟從此心傷獨繭蠶

截象剝蛟百鍊鋒倚空誰拔紫芙蓉諸公枉自羞毛遂
四海無人謁蔡邕長路關心嗟老馬天衢掉尾躍真龍
九張機上雲霞色合在蓬萊第幾重

不倍西京薄建安真源取證解人難鈞天張樂陳千品
王會披圖拜百官終古歌風傷蔓草有時吟澤弔叢蘭
夢中十二歸昌協碧海丹山夜正寒

悲歌倚劒笑狂且萬軸琳琅一草廬身世百年憂未已
文章千古願終虛清規屈宋推前列異采班揚託後車
何日金泥容黼黻九天風雨待吹噓

五君詠

并序

弇居窮巷寂處慙懽歌疏狂人口不理聯裳
接襪有五君焉文章行業師友兼資仰鑽詎能
聲詠斯發樂馬卿之同時幸桓譚之親見挹芬
濡澤不愈於希古抗心乎列其少長作五君詠

六合戴文燦雲軒

安道不彈琴延君惟說禮淵衷富圭璧含輝蘊深美履
道衆忘介飲和物莫鄙讀書三十年不爲軒冕起

雲軒舉於

鄉不赴禮部試

甘泉薛傳均子韻

植業謝雕繪斯人美無度習理洞深遐識字破章句矜

矜茂廉角潭潭擅宏富即觀逍遙游逸足詎堪步子韻深於

許氏之學著有說文答問文選古字通且健步

儀徵劉文淇孟瞻

學粹性亦沈與世忘臧否靈照蒙緇塵淺言隱深理觀

書博芳臭味道如辨水不獨駁規杜二劉真孫子孟瞻博集

左氏傳古注陽湖李申者先生贈詩云二劉今見真孫子慚愧偷書孔護軍

寶應劉寶楠楚楨

彼美來白田十葉被儒服淹雅洞古今萬卷恒不足達

士忌聲聞仁者固訥木遺澤寶清芬編詩授我讀楚楨錄興

先祖父詩有清芬集若干卷

儀徵王僧保西御

涉世與世忘清狂逐杯酒雄辯聒羣聽無惡在人口鶴

翮摩高雲飄飄物難耦一卷秋蓮詞苦心出香藕西御工詞

自名其集為秋蓮子其序云搖落可傷苦心獨喻

輓歐陽蜀江先生錦

無端空谷委生芻豈有靈氛問楚巫萬事傷心虛就養

一經垂老誤為儒蕭齋寂寞餘書幌遺墨飄零有畫圖

椒桂招魂何處是霜風野水白茆湖

蕭蕭木葉冷蒼苔屐齒煙沈黯不開載酒難尋揚子宅

和履言集 卷三
著書空有孝侯臺
縑寒快雪鳴禽杳
絃絕清秋落雁哀
末契藉誰申
感舊明年麥飯爲披萊

寒夜吟

星河寥落元鴻號
中情振蕩奔崩濤
一生戰力盡蝸角
萬事刺心齊蝟毛
愁骨殘燈夜耿耿
夢沈遠柝風騷騷
忍寒獨坐三歎息
披衣起視霜天高

題蕭尺木山水

籍甚蕭思話風流
詎可攀如何泉石意
轉出畫圖間
孤棹雲邊水長林
閣外山從來白門路
幽絕未知還

笛怨

笛怨隔秋水縹緲烟
中聞遠岸落楓葉
青霄流白雲
依臨極浦脉脉望湘君
多少疏麻感何緣
屬雁羣

十二月望對月

流光無住着相對每
情深皎皎當窗影
依依此夜心
烏棲殘雪樹人立廣
庭陰十載秋宵夢
低回不自禁

題宋人早朝圖

玉殿春雲覆罽毼
轉曙光曉風承委珮
旭日麗垂裳柳色
千官遠鶯聲萬戶
長由來清切地
彷彿見金闈

同句生游建隆寺聽問樵上人彈琴

野寺春城外迢迢碧
樹林美人思白雪
招我聽鳴琴
此

和庵詩集 卷三
事從吾好沈吟獨自今
穎師重識面禪意入希音
十指千迴轉山虛水自流
虧成惟妙覺恍忽與誰求
坐久心俱寂相忘物外游
歸途乘暝色殘日下經樓

戊子元日

天機無住著忽忽暗中更
失學滋文病長貧飽世情
謬矜吾道重翻覺此身輕
望古心如結憑誰證我生
鼓琴通妙解彈劔引長歌
杳邈移情遠蒼涼發興多
精光開紫氣心事感流波
卽境皆天設低昂空若何

昔年十五學琴於天寧寺
蜀僧大用越僧學成自
兩師茶毘不到此二十年
矣今攜小生重登大

悲閣喜晤蜀僧佛海雅解
論詩因感舊游
少游如夢幻世外轉多師
流水廿年度雅音餘我思
何人語天姥見月憶我眉
聊復參禪寂湯休與論詩

七夕

蟲響螢飛風露秋仙期消
息信難求從來一水盈盈
隔底使經年脉脉愁雲護
珠宮空北駕天回銀漢正
西流深閨今夕秦川女辛
苦鳴機不自由佳會由來
信有天人間何處覓仙緣
斷無離別成終古但覺相
逢總隔年空外好音虛寂
寂夜深秋色澹娟娟幾回
攜得支機石愁絕橫槎碧
漢邊

與紹周月夜游長干寺

山寺杳沈沈蕭然羣籟歇雲表散清光秋河浸孤月晶
晶心魄寒疑是山陰雪諸天流素輝萬象皆澄澈傑塔
凌珠宮金碧不能別何處尋須彌此卽水晶窟鼻觀來
異香了與人世絕君身信清淨可以契禪悅

與紹周熙載西御句生昆仲登雨花臺呂祖閣

秋晨愜高視飛步尋雲峯南登雨花岡觀闕何玲瓏森
森羣松顛戶牖開虛空江流萬里波一線盤雲中側身
轉東顧海氣蒸濛濛始知飛鳥上天路安可窮時聞桂
子馨醖馥吹秋風坐覺毛骨輕超越塵寰蹤烟靄晝霏

霏衆山鳴清鐘

同丹徒柳賓叔

興宗

游八公洞宿半壑庵聽問樵

上人彈琴賦呈并志別

四山蕭槭風鳴柯攝衣向晚來山阿山童告我寺僧出
劇愁到此空經過披拂松篁坐齋閣新月出嶺棲鳥多
須臾隔澗驟犬吠有僧荷笠歸烟蘿入門見我笑奇絕
問來此地游無他埽除禪榻置羹飯張琴爲我彈樵歌
幽絃宛轉答山鬼意境彷彿開嗟峩俄然罷操下階立
仰天寥落看星河山深夜寒不得寐掩關擁被思吟哦
却憶與君會白下別來三月如飛梭中間事事足慨歎

坐令壯歲空蹉跎此行益覺了無謂時適往謁薦師丹徒令吳晴椒先生
自笑不免遭人呵一生去住豈得已到處無乃遭文魔
賦詩一噓告君去明朝解纜乘江波

留別問公

支公偏愛客移枕暮林前風定落高木山虛鳴暗泉到
來真是幻相對轉茫然爲寫別時意清宵奏玉絃

渡江

此地真天險風濤指顧間雲沈京口驛波突海門山歲
晚苦長望扁舟獨自還賦詩渾漫興蕭颯動江關

江水祠

江水祠藏江上村遠山如削翠當門千秋盼嚮三吳奠
萬里波濤九派存風急神鴉盤木末潮回老鶴踏沙痕
我來欲繫溪毛意空悵靈旗落日昏

詠犬

感精運斗樞詩亦獫兼盧喉賢嗟畜晉載簡喜歸吳白
賭博無賴黃牽戾豈誣由來走百里應陳王會圖

詠羊

鱖鱖不一角日夕聚寒埃仙人石邊起使客雪中來尋
跡過鄭野聞聲登楚臺念茲不退遂正復我心摧

冬不雨

日短晴偏久雲寒陰屢消天心儲化澤農事切春苗曠
望歲云暮幽憂思更遙風驚北戶竹疑是響瀟瀟

冬喜雨

倏覺寒絲散泠泠溜作池風尖翻雪落檐角結冰遲紅
入梅心濕青歸草色滋歲功成萬物天意本無私

和春谷先生望古

并序

持誦真言頓獲妙諦援聖表道貫徹人天說禪
喻詩遐契古昔無語言文字之爲善斯色聲香
味之所該微妙正覺遭遇吾師幽讚虛求願爲
弟子敬奉四十字助贊高深

萬法一無法云何究宗旨衆心契真如佛眼觀無始洞
穿十地根慧證三空理膜拜禮金仙浩劫伊胡止

正月五日見新月有懷

此月猶常月娟娟若更明清光碧雲影遙憶美人情澹
掩玉窗夢寒驚烏鵲鳴天涯如不遠相望幾回縈

題正上人禪院梅花

僧院寒梅媚早春疎枝點點未花勻拜經臺上日初暖
洗鉢池邊風正新索笑記曾親古佛吟詩不待寄離人
腥紅雪白愁攀折留與諸天說法因

題友人幽篁鳴琴圖

和履詩集 卷三 三
我生嗜琴幼成癖拂拭枯木奏霹靂一彈一鼓知者稀
換羽移宮究何益久欲還山蠟雙屐廣陵散絕真可惜
君獨胡爲契幽寂眠琴白石常抱膝空山無人永朝夕
水澹澹兮雲溶溶風清冷兮野烟碧何日與君調素絲
鳴鳳律手揮日送引虛無竹林蒙密秋蕭瑟

春江花月夜

春江花開春月輝花紅月白照人衣可憐一片春江水
不到春來送客歸明明月色開芳樹演漾波光采蘭渡
不照花中人在家只照花中人去路花路迢迢芳草新
草青花落幾多春何地無人不看月何處無花不看人

人生好似東流水百折千回月光裏水上飄搖離別人
月中窈窕嬋娟子離別嬋娟兩不逢佳期入夢總成空
歲歲年年春月白年年歲歲春花紅花有開殘月有落
花月相思苦無著麗色飛來翡翠衫流光散入珍珠箔
此夜開簾獨上樓樓頭望見去來舟錦帆掩映春花影
桂棹沿洄春水流流水無情西復東花殘月落怨春風
枉教春月開深夜底事春花放幾叢徘徊花月長相憶
江上人歸歸不得夢醒烏啼待曉光惆悵江南隔江北
春齋坐雨柬句生

東風吹暖晴雲開期君攜手登春臺驕陽十日太歌灼

怪哉一夕與風雷玉窗開落梅花早愁見殘紅委芳草
徘徊躑躅感流光獨自思君令人老

奉同春谷先生泛湖登雲山閣

我生不如海上鷗嗒然每覺中心愁高視乾坤訪丹訣
與誰共說逍遙游今年東風入春早晴色烟光滿芳草
興來呼我泛扁舟百頃風漪淨如埽須臾繫纜隄邊寺
梅子落花香滿地寺前湖水碧迢迢綠雲一道穿長橋
雲山之閣晴入望攝衣更與尋僧寮此時日照花中午
四邊碧樹黃鸝語春色關人爾許深幾年到此難重數
夫子登樓忽漫吟余亦風前彈素琴蕭然羣籟一時息

却令山水含清音流光過眼真如夢樽酒鶯花等閒送
萬古江河日月光幾人得有文章重青天落日懸春愁
我今二毛何所求願求夫子餐霞術揮手呼龍到十洲

參園木蘭花賦呈春谷先生

木蘭天上花開遍芳園中參差兩仙植玉樹慚菁葱一
株倚畫樓彷彿撐青空一株臨翠池婆娑映簾櫳萬蘂
垂香雲千枝搖春風錯疑瑤臺雪飛下蓬萊峯二月暖
不消晶光疊重重夫子玉堂仙偶涉塵寰蹤詩篇照天
地筆苞造化工當花染文翰字字爭玲瓏得無瑤華音
上報東皇宮馨香願盈把相與乘飛龍

紹周歸自江洲

聞君逐幽寂遠訪蒼江濱一別歲華晚相逢芳草新衣
沾柳邊雨屐踏花中塵試問勞勞者如何見此人

春閨

玉鏡塵封明月光珍珠簾箔掩蘭堂何嘗豔色能傾國
只是離情枉斷腸淚濕櫻桃紅雨落夢牽楊柳碧烟長
可憐誤唱江南曲此恨傷心總不忘

上巳出游

踏翠尋芳過水濱比來惆悵倍逡巡那無情緒逢春日
終覺風花觸恨人芳草萋迷天外路楊枝繾綣夢中塵

鎬京宴飲華林射誰是文章侍從臣

趙蓮淑

丙

見贈永樂瓷杯既而索歸詩以嘲之

製作真堪擬化工何來與奪任西東君家故返連城壁
魯國難勝大屈弓好自金聲防擲地莫同銀盃解飛空
荒齋更憶忘形容非有先生亡是公

次楚楨過齋中看牡丹韻

欄干曲曲護腥紅四月園林罨畫中果是國香能絕代
故教幽谷駐春風

金尊狂飲醉花前采筆飛雲直補天安得此花長供奉
人間芳草任年年

八閩同孟瞻楚楨卓人飲城北酒樓

日色含烟下高樹兩君攜我出門去新晴不用蠟屐行
草輒沙平城下路花陰十步九徘徊趁著餘曛黯催
尋芳踏翠嘆銷歇舉頭月色空中來清輝飛輪淨如掃
却疑身入千花臺兩君興發便沽酒幸及杖頭錢尙有
陳生入市致肴膳痛飲酣歌忘誰某且盡當筵今夕歡
世上虛名那堪取水面燈船去似雲管弦啁哳不勝聞
波光搖碎月光亂綠烟演漾金沙痕酒中樂酣夜方半
燈火零星舫戛岸喑喑城頭烏夜啼星斗參差列河漢
我欲升天問明月碧雲遮斷蓬萊闕夢向三山去采芝

誰能坐待看華髮醉裏不知樽酒空狂呼直欲生長風
仰天大笑嫵姍走共聽僧樓月下鐘

風林偶閱庚子銷夏記愛其書刻甚工因題

一編遺迹姓名詳細字蠶眠寫萬行對此精靈移恍惚
由來文物重琳琅斷紈零素沈秋草玉躑金題冷夕陽
我自閒齋披一過摩挲人代感茫茫

風簷雨中湖上看芍藥放歌

日出朝光散窗牖曉起清吟弄花柳幾人剝啄叩荆扉
約我郊行共攜手芳路迢迢踏落花霏紅積翠迷雲涯
須臾青霄換晴色東風吹雨紛如麻就中豪舉二三子

和居言集 卷三
欲駕扁舟泛湖水，雨衝風險不辭狂。歌直入滄浪裏，
清波百丈碧於烟。風漪浩蕩涵空天，山容樹影不復辨。
水光合與天光連，畫舫參差雙槳疾。去如鷺鳥催歸翼，
風聲格格攪窗飛。雲氣沈沈壓篷黑，錦纜周遭繫柳陰。
簪裾雜遝穿花林，丹霞落地映芳草。萬枝紅藥烟中深，
行行踏遍花邊路。衫袖霏微濕香霧，絕代紅顏撼雨風。
對此踟躕不能去，此時行樂難再得。同舟況是神仙客，
風格飄搖鸞鳳姿。文章秀卓江山色，好是相如重閒雅。
莫學馮唐歎頭白，舟回別浦斜陽開。激越長歌歸去來，
何時黃鶴空中舉。便與諸君戲九垓。

與孟瞻楚楨西御玉波酒肆小飲

水榭凌虛暝色開，幾人攜得杖頭來。驚心歲月都難著，
到眼芳華又易催。堞影低斜沈樹入，棹歌遠散逐波回。
談詩說劍當筵樂，好趁清狂數舉杯。

與孟瞻游建隆慧因竹林諸寺

會適良獨難，清游欣屢屬。余旣飽閑散，君復恣沈默。爾
我曠遐思，雲烟契高躅。茲焉奚辟人，且得縱塵日。
招提緣勝覽，妙道將安尋。層宮杳寂寂，衆林靄陰陰。人
天合其仰，去來不住心。與君罄正覺，時聞清鐘音。

江上

九月芙蓉江上秋白雲流水不勝愁年來無限滄浪興
目斷烟波萬里舟

雨霽

葉底斜陽帶雨痕輕寒輕暖欲黃昏桐花滿地蒼苔滑
深巷無人早閉門

春谷先生七夕招飲並讀甫錄成夢陔堂詩集

深宵銀漢正西流高館琴樽合唱酬星月娟娟宜七夕
文章字字足千秋風前頓覺生珠玉天上應須控斗牛
我醉闌珊聞漏轉却疑身入絳河游

題飲泉先生畫草

生綃半幅寫芳馨晴色烟光逼畫屏荏苒不勝天外遠
萋迷都入夢中青幾人招隱王孫路何處相思帝子靈
最是熙荃工點綴蕭蕭風雨閉閒庭

飲泉先生以蓼園七夕宴集距今匝月感賦成詩

分柬諸子

芳辰容易過詩思洽吾儔有會偏成感清吟不耐秋露
桐翻鵲起風柳曳蟬愁依舊青天月金波灩灩流

聞菴

問爾勞何事秋來感不禁草深沈斷響風細轉孤吟別
館羈人夢寒燈倦客心年年空所俟愁絕短牆陰

秋夜怨

垂手綺窗邊無情歌采蓮玉容沈水鏡別夢冷秋絃竹
密華星爛桐疎璧月圓年年望牛女端爲兩心憐

豆花

荷鋤歸去晚籬落碧叢叢白糝山騰雪香流野徑風葉
深藏小蝶苗蔓引寒蟲筐筥堪秋實由來總未同

和談星台

怡曾見贈之作

十年花下記論文樽酒清狂氣薄雲在自幽憂空顧我
不堪牢落更憐君紫鸞鍛羽猶驚衆天馬銜鞿待出羣
展對一編心魄動欲將筆硯幾回焚

聞道維摩病態慵竭來果異昔時容丰神瘦減經秋鶴
文字雄於出峽龍苔澀藜牀涼雨潤花園書幌碧烟濃
乘閒擬奏清商曲共聽蕭寥萬壑松

秋江曲

秋江八月秋水生烟波浩蕩愁人行行人一去不辭遠
露白風高日將晚采采芙蓉江上花所思不見天之涯
江頭無限如花女門對寒流獨浣紗

同人分做江文通擬古四首

張廷尉雜述

萬類納大鈞在化任榮瘁虛懸契真始羸縮豈定位達

人貴知足彭殤等一寄木雁謬是非蕉鹿殊夢寐焉知
憑噫氣穴竅分萬吹靜觀證無生適道愜所置潁陽洗
耳人不與堯舜治抗情耽希夷何者不遐棄

盧中郎感交

彥聖不世出由來與道升虎嘯谷風合龍起元雲蒸顧
瞻二三子壯志殊凌兢遐才著雄畧都人嘉譽稱載道
必蓄寶矧茲運會乘傳說協殷兆吉甫懋周興樂毅鎮
燕冀蘭生侍峭澠偉哉四賢績勉旃在良朋我慚斗筲
器弗與鼎鼐勝綢繆喻夙昔見善心如登詩篇表情悽
舊恩良服膺

袁太尉從駕

天儀循廣陌和鑣揚八鸞肅恭覲我后袞冕躋祠壇輕
塵翳藻仗條風穆旌竿春卿辨六祝農扈鳩九官鳴笳
溢浩倡設次麗壯觀颺土察毗務陳詩敷教寬金戈夾
葆翠蓋盾流軒丹觀謠溥畿甸高烟靄林巒繞爐新藻
冑牙輦繁花攢廣筵肆瑤圃天祝聞嵩山夏頌美休豫
周轍豈游盤展詩備宿衛渥恩濡飛翰

休上人怨別

碧月下江渚坐惜蕙草芳我懷復何如所思在瀟湘惆
悵殊未已離緒亦孔長恒恐鷓鴣旦鳴木葉零繁霜開樽

和風詩集 卷三
挹椒醕撥琴奏清商湛露泣珠薄輕飈動蘭堂相思隔
楚水夢繞巫山陽

九日同諸公登江天寺塔

琳宮出諸天笑兀壓巨浪循虛盤磴道回旋萬千狀崇
簷礙日角風鈴響雲上不涉龍象地焉足逞超曠驚風
撼野水碧海環東向江天無數峯邈迤但烟障俯觀鴻
雁翔遠與風帆傍不信虛無中天路恒在望登高愜蕭
晨心焉更惆悵

焦山古鼎歌

海門晝靄開朝暎雁堂靜謐鳥不喧寺僧引我覲古鼎
屹然譎詭雙龍蹲開函拭冪發光怪五色或若手莫捫
一鼎製欸昉周代無專南仲名俱存字體錯落類石鼓
擬以時代當周宣册錫元衣戟縞緝無專對揚天子恩
古者慶賞必于庶九月旣望圖室燔論譔功德懿且美
用割眉壽宜子孫一鼎陶陵信漢物共王出鎮雄東藩
五十二字縱復橫爲斗爲蓋須同論隄廩舊地屬三輔
共厨作器充陵園丁姬墓荒穴狐兔此鼎或與烹蘋蘩
嗚呼二鼎自典重以周匹漢無輕軒金精煥灼互相射
豈亞虢敦紀伯廡蝌蚪蜿螭雜篆隸雲雷縵爛華星繁
祥光永與慧日麗遠祛饕餮出尤魂偉哉二鼎幸遭值

法象合守空王門苔點漏斑錯金碧梅檀花雨香氤氳
我來訪古後百代賦詩蹇吃辭無源蒲牢一振衆山響
東瞻大海波瀾奔

嵇庵詩集卷三終

